




Digi Vestland

samordna regional digitalisering

01000:00 0110:001 0100111 01101001
00100000 01010110 01100101 01110011
01110:00 0110:100 01100001 01101110
01100100

INNHALD

1. INNLEIING	3
2. OM DIGI VESTLAND	4
2.1 Historie	4
2.2 Visjon	4
2.3 Overordna effektmål	4
2.4 Innsatsområde	4
Kompetanse	4
Konsept- og prosjektforslag	4
Felles digitale løysingar	4
Samhandling	4
2.5 Ressursar og arenaer	5
Faggrupper	5
Prosjekt	5
2.6 Organisering og leiing	5
3. INNHALD OG VERDI FOR DEN ENKELTE KOMMUNE	6
4. FINANSIERINGSMODELL	7
5. SAMARBEIDSAVTALE	9



1. INNLEIING

Alle kommunar skal møte dei same lovpålagte oppgåvene og ha interaksjon med dei same sektorane og aktørane, trass i at utgangspunktet og føresetnadene varierer. Innbyggjarar og næringsliv forventar i dag digital samhandling med kommunen, sjølvbeteningsløysingar og tilgang til å opne data. Teknologi gjer det mogleg å automatisere deler av den kommunale saksbehandlinga. Kvalitet og effektivitet i den digitale samhandlinga med innbyggjar, organisasjonar og næringsliv er viktig for den enkelte brukar av kommunale tenester, den interne saksbehandlinga og for samfunnet som heilskap.

Behovet for forsterka innsats på digitaliseringsområdet og sektorspesifikke krav til bruk av standardar og felleskomponentar er tydeleg adressert i regjeringa sin digitaliseringsstrategi «En digital offentlig sektor», som er utarbeidd i samarbeid mellom regjeringa og KS.

KS Landsting vedtok i februar å gi KS eit sterkare mandat for å samordne og sikre auka gjennomføringskraft på digitaliseringsområdet i kommunal sektor. Eit sentralt tiltak er styrking og etablering av regionale digitaliseringsnettverk.

Etablering av regionale samarbeid som bidrar til realisering av strategien, er tungt forankra i KS. Digi Vestland er eit slikt samarbeid.


Samarbeidet har ei styringsgruppe som består av rådmenn, og er nær knytt til KS sin styringsstruktur på digitaliseringsområdet, KommIT-rådet, med underliggende utval og fagråd.

Behovet for regionale samarbeid har auka i takt med omfanget av statlege digitaliseringsprosjekt som treffer kommunane, og med nasjonale felleskommunale prosjekt og løysingar. Kommunane opplever at det er krevjande å halde oversikt og møte dei nasjonale initiativa på ulike tenesteområde.

Formålet med samarbeidet er blant anna

- å arbeide saman med KS for å løyse kommunane sine behov gjennom nasjonale og felleskommunale satsingar på digitaliseringsområdet.
- å vere eit gjennomføringsorgan som legg til rette for og støttar kommunane i mottak av nasjonale/felleskommunale løysingar.
- å framstå som eit bindeledd mellom den enkelte kommune og KS.

Sentrale mål for arbeidet er å oppnå gjenbruk, dele erfaringar og løysingskomponentar i heile fylket, og å bidra regionalt inn i den nasjonale utviklinga.



2. OM DIGI VESTLAND

2.1 Historie

Dei første kommunane i Samordna regional digitalisering Hordaland (Digi Hordaland) inngjekk ein samarbeidsavtale i mars 2018. Seinare blei samarbeidet utvida til å omfatte alle kommunane i Hordaland. I 2020 blei namnet endra til Digi Vestland, samtidig som det blei søkt om eit samarbeid mellom alle dei 43 kommunane i fylket. Samarbeidet skal hjelpe kommunane med å møte utfordringar. Det bygger vidare på det tidlegare samarbeidet i Hordaland, og skal knytast mot strukturar KS etablerer i tråd med vedtak på Landstinget i februar 2020.

2.2 Visjon

Gode, likeverdige og berekraftige tenester

Vi vil at folk skal ha tilgang til gode og likeverdige tenester, uavhengig av kva kommune dei bur i. Tenestene må òg vere berekraftige både med tanke på økonomi, miljø og tilgjengeleg arbeidskraft.

2.3 Overordna effektmål

Effektiv digitalisering i kommunane

Ved å gå saman i eit digitaliseringssamarbeid skal kommunane kunne handtere og utnytte den digitale utviklinga. Vi skal tilpasse dei digitale løysingane i fellesskap, og ta dei raskt og effektivt i bruk.

2.4 Innsatsområde

Kompetanse

Digi Vestland har etablert ei rekke nettverk innanfor tenesteområde og fag. Ved å delta aktivt i desse nettverka bygger vi felles

kompetanse og sikrar at den enkelte kommune får tilgang til den samla kompetansen i regionen.

Konsept- og prosjektforslag

Regionen skal vere ein aktiv bidragsytar til utviklinga av innovative løysingar i kommunal sektor. For å fremme gode konsept- og prosjektforslag vil vi fokusere på faggrupper, tverrfagleg samarbeid og samarbeid med eksterne kompetansemiljø.

Felles digitale løysingar

Vi legg til rette for koordinering og innføring av nasjonale og felleskommunale digitale løysingar som kan brukast på tvers av kommunegrenser. Løysingane skal bidra til at brukarane oppfattar offentlege tenester som einskaplege. Erfaringsdeling og samordna innføring av nasjonale løysingar forenkler mottak og reduserer tid og prosjektkostnader for den enkelte kommune. Gjennom dei faglege nettverka våre kan vi identifisere behov som blir kvalifiserte og formidla vidare til KS. Dette blir grunnlag for utvikling av nye nasjonale løysingar.

Samhandling

Kompetansenettverka i Digi Vestland arbeider aktivt for styrka samhandling regionalt og nasjonalt. Gjennom fellesmøte og prosjekt, ulike samhandlingsløysingar og kompetansedeling sikrar vi ein open dialog og effektiv deling av informasjon. Vi søker ei aktiv deltaking i nasjonale faggrupper, nettverk og prosjekt, og effektiv deling av kunnskap og informasjon til kommunane.

2.5 Ressursar og arenaer

Faggrupper

Faggruppene utgjør regionale kompetanseorgan og arbeidsgrupper som blir nytta til prosjektarbeid og deling av kunnskap og erfaring. Det finst faggrupper for ulike område i kommunen. Desse møtest jamleg og diskuterer relevante tema, løyser utfordringar og deler erfaringar.

Prosjekt


Digi Vestland jobbar med ei lang rekke regionale og nasjonale prosjekt, blant anna i dei ulike faggruppene. I dei nasjonale prosjekta jobbar vi for at funksjonane, utbreiinga og bruken av løysingane skal gå raskare og bli betre for kommunane og innbygarane. Digi Vestland bidrar aktivt i fleire av dei nasjonale prosjekta, og

produserer materiell som innføringshandbøker og liknande, for å gjere det enklare for kommunane i samarbeidet å ta dei i bruk. Der det er behov, hjelper Digi Vestland kommunane med innføring i form av bistand og eventuelle regionale prosjekt.

Dei regionale prosjekta handlar om å utvikle regionale løysingar eller å løfte regionale initiativ til nasjonalt nivå. Kommunane i samarbeidet blir invitert til å delta i prosjekta. Som i dei nasjonale prosjekta, blir det utarbeidd materiell, rettleiingar og bistand som skal hjelpe kommunane å ta i bruk løysingane.

2.6 Organisering og leiding

Samarbeidet blir leia av ei styringsgruppe som består av rådmenn frå deltakarkommunar. Styringsgruppa har eit sekretariat som koordinerer dei ulike prosjekta, medan faggruppene representerer eit breitt fagleg samarbeid på tvers av kommunane.



3. INNHOLD OG VERDI FOR DEN ENKELTE KOMMUNE

Vestland fylke har ein stor breidde av kommunar, både store og små, og kommunar som representerer by og distrikt. Digi Vestland skal ta i vare dette mangfaldet i prosjekt og på nasjonale arenaer der samarbeidet er representert. Interne strukturar med underliggende prosessar skal sikre dette.

Gjennom å utvikle og ta vare på eit langsiktig fagleg samarbeid og tilgang til felles løysingar og ressursar innanfor digitaliseringsområdet skal kommunane oppnå kvalitative innbyggareffektar, auka grad av sjølvbetening, meir effektiv tenesteproduksjon og betre ressursutnytting. Ansvar for å realisere gevinstane ligg hos kvar enkelt kommune.

Risikoen for eit digitalt klasseskilje mellom kommunane er aukande. Gjennom samarbeidet ønsker partane å hauste felles erfaringar og etablere ei system- og kompetansemessig plattform som jamnar ut ulikskapane og forenkler innsatsen på digitaliseringsområdet. Dette inneber at kommunane kan realisere synergjar og sikre

- deltaking på felles faglege arenaer
- tilgang til felles ressursar
- oppdatert innsikt og kunnskap frå nasjonale arenaer
- innføring av standardiserte løysingar og tenesteprosessar på sentrale område
- koordinert mottak av statlege og felleskommunale prosjekt
- koordinerte regionale anskaffingar

Eit felles kompetansemiljø på digitaliseringsområdet gjer det enklare å gjennomføre felles tiltak, og er ein arena der kommunane kan møte nasjonale initiativ.

Samarbeidet bidrar til å forenkle informasjonsflyten mellom kommunane sine interne løysingar og fellesløysingar som følger av nasjonale, statlege og felleskommunale tiltak.

Kollektiv læring, erfaringsutveksling og felles infrastruktur gir grunnlag for å realisere framtidige effektar. Det regionale samarbeidet legg til rette for standardisering, samordna utvikling og auka gjennomføringskraft på digitaliseringsområdet. Kommunane er dermed betre rusta til å ta i bruk og realisere effektar av nasjonale felleskomponentar og elektronisk samhandling mellom forvaltningsnivåa.



4. FINANSIERINGSMODELL

Til og med 2020 har det regionale samarbeidet vore finansiert i eit spleiselag med direkte og indirekte bidrag og eigeninnsats frå fem kommunar (Alver [tidlegare Lindås], Askøy, Bergen, Bjørnafjorden [tidlegare Os] og Øygarden [tidlegare Fjell]) og skjønnsmiddeltilskot frå Fylkesmannen i Vestland (tidlegare Hordaland). Det direkte kontantinnskotet frå dei fire minste kommunane har vore kr 500 000 per år. I tillegg har kvar kommune bidratt med eigenfinansiering av eiga aktiv deltaking med ressurspersonar innanfor teneste- og faggrupper og prioriterte satsingar/tiltak. Resterande kostnader knytt til fullfinansieringa er dekt av Bergen kommune gjennom eigeninnsats og deltaking i nasjonale prosjekt og fora.

Styringsgruppa meiner at det ikkje er naturleg at eit fylkesdekkande nettverk blir finansiert av eit avgrensa tal på kommunar, men at alle kommunar i fylket bidrar til finansieringa. Det er derfor vedtatt ein tredelt finansieringsmodell. Finansieringsmodellane for dei ulike delane vil variere.

Dei tre delane relaterer seg til

1. grunnfinansiering (drift av sekretariat og regionale fellesprosjekt/tiltak)
2. uttak av ressursar frå felles kompetansemiljø
3. mottak av nasjonale løysingar

Drift av sekretariatet inneber

- sekretariatsfunksjon
- etablering, utvikling og drift av fag- og tenestenettverk
- prosjektleiing felles prosjekt
- kompetansehevingstiltak
- regionale kartleggingar
- prosjekt- og arkitekturarbeid (regionalt og som bidrag nasjonalt)

- utprøving og tilrettelegging for innføring av nasjonale løysingar
- utprøving, tilrettelegging og innføring av felleskommunale løysingar

I grunnfinansieringa inngår òg finansiering av regionalt tilsette e-leiarar for områda helse, oppvekst og plan, bygg, geo.

Styringsgruppa har vedtatt at kostnadsfordelinga knytt til grunnfinansieringa skal bygge på innhaldselement som inneber økonomisk bidrag frå den enkelte kommune innanfor ei maksimumsgrense, innbyggartal og fast grunnbeløp.

Med utgangspunkt i 2019-tal og forventa auke i aktivitetsnivået, og finansiering av e-leiarar innanfor tre tenesteområde, er det berekna at det samla finansielle behovet for grunnfinansiering i 2021 vil vere om lag 19,5 millionar kroner.

Frå 2021 blir samarbeidet vurdert som etablert, og det kan ikkje påreknast økonomisk bidrag frå fylkesmannen til grunnfinansiering av samarbeidet.

Vestland fylke har om lag 636 000 innbyggjarar per 1. januar 2020. Av desse bur 284 000 i den største kommunen, om lag 38 000 i den nest største. 30 kommunar har mindre enn 10 000 innbyggjarar, 21 kommunar har mindre enn 5000 innbyggjarar og åtte kommunar har mindre enn 2000 innbyggjarar.

Storleiksforskjellane gjer det krevjande å finne ein rimeleg fordelingsnøkkel. Det vil derfor vere mogleg for dei kommunane som er involverte i regionale IKT-samarbeid å finansiere deltakinga si i Digi Vestland gjennom eit felles økonomisk bidrag som svarer til kommunane i driftssamarbeidet sin del av det samla grunnfinansieringsbehovet.

Innbyggartalet i Bergen kommune utgjer om lag 45 % av det samla innbyggartalet i fylket. Gjennom eigeninnsats i nasjonale

prosjekt, og kontantbidrag, vil Bergen kommune dekke 47 % av det samla grunnfinansieringsbehovet. Dei resterande kommunane må til saman finansiere 53 %, berekna til 10,4 millionar kroner.

Grunnfinansiering

Grunnfinansiering inneber drift av sekretariat og fellesprosjekt/tiltak. I dette ligg òg kostnader knytt til forankringsarbeid og regionale samlingar. Det finansielle behovet blir fordelt mellom kommunane innanfor ramma av ei maksimumsgrense (kr 500 000), innbyggartal (kr 20 per innbyggjar) og fast grunnbeløp (kr 100 000).

Uttak av ressursar frå felles kompetansemiljø

Bruk av ressursar frå det felles kompetansemiljøet til å dekke særskilte behov eller gjennomføring av spesifikke tiltak i ein enkeltkommune er ein kostnad den enkelte kommune må dekke. Avhengig av form og innhald på leveransen kan dette vere kompensasjon for brukt tid og tilgang til metodar, verktøy mv.

Mottak av nasjonale løysingar

Det regionale samarbeidet vil sikre tilrettelegging og koordinering inn mot dei nasjonale prosjekta, og legge til rette for regional innføring av løysingane innanfor dei økonomiske rammene som følger av grunnfinansieringa.

For å kunne nytte dei nasjonale løysingane finansierte gjennom «DigiFin» må kommunane

- ha betalt det innbyggjarfastsette bidraget til «DigiFin»
- dekke kommunen sin del av felles utviklingskostnad til KS
- betale oppgradering til rett versjon av det aktuelle fagsystemet dersom dette er naudsynt
- kjøpe fagsystemet sin modul med ny funksjonalitet dersom dette er naudsynt
- dekke eventuelle kostnader som følger av løysinga sin eigenart

Det blir lagt til grunn at kvar kommune sjølv dekker kostnadene knytte til mottak av nasjonale løysingar og innføringsprosjekt i eigen kommune. Kommunen si evne til å leie og gjennomføre mottaksprosjekt i eigen organisasjon vil avgjere om det kan tilkome kostnader til kjøp av bistand frå felles kompetansemiljø, systemleverandør eller andre marknadsaktørar.

5. SAMARBEIDSAVTALE

Styringsgruppa har arbeidd fram ein samarbeidsavtale som dei anbefaler kommunane å ta del i. Avtalen føreligg som vedlegg på dei neste sidene.

AVTALE

KNYTT TIL REGIONALT DIGITALISERINGSSAMARBEID

Mellom

Xxx, Yyy, etc (43 kommunar*) i Vestland fylke er det i dag inngått følgande avtale:

Bakgrunn

Alle kommunar skal møte dei same lovpålagte oppgåvene og ha interaksjon med dei same sektorar og aktørar trass i at utgangspunkt og føresetnader i den enkelte kommune varierer. Innbyggjarar og næringsliv forventar digital samhandling med kommunen, sjølvbeteningsløysingar og tilgang til opne data. Teknologi gjer det mogleg å automatisere deler av den kommunale saksbehandlinga. Kvalitet og effektivitet i den digitale samhandlinga med innbyggjarar, organisasjonar og næringsliv er viktig for den enkelte brukar av kommunale tenester, den interne saksbehandlinga og for samfunnet som heilskap.

Behovet for forsterka innsats på digitaliseringsområdet og sektorspesifikke krav til bruk av standardar og felleskomponentar aukar i takt med at omfanget av statlege digitaliseringsprosjekt som vedkjem kommunane og nasjonale felleskommunale prosjekt og løysingar veks fram. Kommunane opplever at digitale trendar utfordrar dagens tenesteproduksjon, og at det er krevjande å møte dei nasjonale initiativa innanfor ulike tenestekområde. Det felles regionale samarbeidet skal hjelpe kommunane til å møte desse utfordringane. Samarbeidet bygger vidare på erfaringane frå det tidlegare digitaliseringssamarbeidet i Hordaland, «Samordna regional digitalisering» og vil knytte seg mot dei strukturane KS etablerer med utgangspunkt i vedtak på Landstinget i februar 2020.

Formålet med samarbeidet

Over ein periode har det vore aukande medvit i kommunal sektor om nytta av sterkare koordinering, samordning og prioritering av tiltak på digitaliseringsområdet. Kommunane og fylkeskommunane har i samband med dette oppfordra KS til å ta ei sentral rolle i dette arbeidet. Det gjeld særleg koordinering og det å fremme sektoren si interesse opp mot statleg nivå, men òg i arbeidet med felles utvikling av nasjonale løysingar. Regjeringa sin digitaliseringsstrategi har tydelege forventningar om at kommunal sektor i større grad skal involverast og medverke i avgjerder om korleis digitaliseringa av offentleg sektor skal skje, særleg på område som vedkjem kommunal sektor.

Formålet med samarbeidet innanfor Digi Vestland er å understøtte KS i arbeidet med nasjonale og felles kommunale satsingar på digitaliseringsområdet, vere eit tilretteleggande gjennomføringsorgan som støttar kommunane i digitaliseringsarbeidet og framstå som eit

bindeledd mellom den enkelte kommune og KS i dette arbeidet. Det skal arbeidast for å sikre at digitaliseringsnettverket blir ein sentral del i KS sin samstyringsstruktur på digitaliseringsområdet.

Det er eit mål for samarbeidet å oppnå gjenbruk av erfaringar og løysingskomponentar i heile fylket og å bidra regionalt inn mot nasjonal utvikling. Sekretariatet vil derfor aktivt arbeide for regional representasjon på relevante arenaer.

Sekretariatet skal greie ut område der kommunane ser nytte av felles tilnærming, og prøve ut felles løysingar innanfor et felles rammeverk, i størst mogleg grad på den felles integrasjons- og tenesteplattforma for kommunal sektor (FIKS). Sekretariatet skal samarbeide med KS regionalt og nasjonalt med sikte på å bidra til overføringsverdi til kommunane i regionen og nasjonal konsistens.

Verdien av samarbeidet for den enkelte kommune

I Vestland fylke er det både store og små kommunar og kommunar som representerer by og distrikt. Digi Vestland skal ivareta dette mangfaldet i prosjekt og på dei nasjonale arenaene der samarbeidet er representert. Interne strukturar med underliggende prosessar skal sikre dette.

Gjennom å utvikle og ta vare eit langsiktig fagleg samarbeid og tilgang til felles løysingar og ressursar innanfor digitaliseringsområdet skal kommunane oppnå kvalitative innbyggareffektar, auka grad av sjølvbetening, meir effektiv tenesteproduksjon og betre utnytting av ressursane. Ansvar for å realisere gevinstane ligg hos den enkelte kommune.

Risikoen for eit digitalt klasseskilje mellom kommunar er aukande. Gjennom samarbeidet ønsker partane å hauste felles erfaringar og etablere ei system- og kompetansemessig plattform som jamnar ut ulikskapar og forsterkar og forenkler innsatsen på digitaliseringsområdet. Dette inneber at kommunane kan realisere synergjar, og sikrar

- deltaking på felles faglege arenaer
- tilgang til felles ressursar
- oppdatert innsikt og kunnskap frå nasjonale arenaer
- innføring av standardiserte løysingar og tenesteprosessar på sentrale område
- koordinert mottak av statlege og felleskommunale prosjekt
- koordinerte regionale anskaffingar

Eit felles kompetansemiljø på digitaliseringsområdet vil auke moglegheita for å gjennomføre felles tiltak og vere ein arena å møte nasjonale initiativ på. Samarbeidet vil i tillegg kunne bidra til å forenkle informasjonsflyt mellom kommunane sine interne løysingar og fellesløysingar som følger av nasjonale statlege og felleskommunale tiltak.

Kollektiv læring, erfaringsutveksling og felles infrastruktur gir grunnlag for å realisere framtidige effektar. Ved å legge til rette for standardisering, samordna utvikling og auka gjennomføringskraft på digitaliseringsområdet vil det regionale samarbeidet bidra til å styrke kommunane sin moglegheit for å ta i bruk og realisere effektar av nasjonale felleskomponentar og elektronisk samhandling mellom forvaltningsnivå.

Partane si rolle og ansvar i samarbeidet

Ansvar for alle deltakande partar

Kvar part har ansvar for å arbeide for at formålet i avtalen blir oppnådd. Partane har òg ansvar for å bruke verkemidla dei har til rådvelde for å sikre måloppnåing, bidra med ressursar på felles arenaer og i prosjekt som blir etablert, og å arbeide for at relevante fellesløysingar blir tatt i bruk.

Dei deltakande partane ber sine interne kostnader som følger av samarbeidet.

Alle deltakande kommunar kan forplikte seg til å ta på seg ansvar som prosjekteigar for regionale prosjekt. Dette inneber å sikre at prosjektet svarar ut dei deltakande kommunane sine behov innanfor framdriftsplanar og budsjett det er semje om, medrekna tilrettelegging for innføring av løysing i samarbeidskommunane i dei tilfella dette er ein del av prosjektet sitt mandat. Fordeling av prosjekt mellom dei deltakande kommunane framgår av den til ei kvar tid gjeldande prosjektporteføljen.

Dei deltakande kommunane skal vere knytte til den nasjonale finansieringsordninga («DigiFin») som KS etablerte for dette området i 2017.

Spesielt for Bergen kommune

Bergen kommune har ansvar for tilrettelegging av eit felles sekretariat/prosjektkontor samlokalisert med Seksjon for digitalisering og innovasjon.

Med utgangspunkt i Bergen kommune sin posisjon på den nasjonale arenaen og gjennom kommunen sitt samarbeid med andre større kommunar er det svært sannsynleg at det vil framkomme større innovative initiativ. Bergen kommune blir oppfordra til å involvere det regionale samarbeidet der det er naturleg og mogleg.

Spesielt for kommunane med representasjon i styringsgruppe

Kommunar med representasjon i styringsgruppa har eit særskilt ansvar for å informere og involvere rådmenn i sine geografiske område og eventuelt andre kommunar innanfor den porteføljen av kommunar som er tilknytte den felles driftsleverandøren deira.


Organisering

Realiseringa av arbeidet med å nå formålet i avtalen er organisert gjennom eit sekretariat, «*Sekretariat for DigiVestland*». Sekretariatet har ein koordinerande funksjon.

Tiltak skal organiserast som prosjekt, og bli leia av ein part i samarbeidet. Parten har eit regionalt gjennomføringsansvar. Andre kommunar deltar med ressursar inn i arbeidet. Den enkelte deltakande kommune har eit sjølvstendig ansvar for å realisere gevinstar av tiltaket.

Tiltaka blir leia ut i frå prinsippet om at mest mogleg ansvar blir delegert til det enkelte prosjekt innanfor rammer av sentral styring og koordinering. Partane er einige om at Bergen kommune leiar sekretariatet i medhald av prinsippa gitt nedanfor.

Sjå vedlegg for nærare skildring av organiseringa av samarbeidet.



Figur: Organisering av samarbeidet per juni 2020.

Leiar for styringsgruppa

Kommunaldirektøren for Bergen kommune byrådsavdeling finans, næring og eiendom, eller den han utpeikar, leiar styringsgruppa.

Leiar for styringsgruppa kallar inn til møte i styringsgruppa, og er ordstyrar for møta.

Styringsgruppe

Styringsgruppa består av

- Kommunedirektør/ Rådmann i Alver kommune (representerer Alver og kommunane i Nordhordland)
- Kommunedirektør/ Rådmann i Askøy kommune
- Kommunedirektør/ Rådmann i Bjørnafjorden kommune
- Kommunedirektør/ Rådmann i kommune i Hardanger/Voss
- Kommunedirektør/ Rådmann i kommune i Nordfjord
- Kommunedirektør/ Rådmann i kommune i Sogn/Sunnfjord
- Kommunedirektør/ Rådmann i kommune i Sunnhordland
- Kommunedirektør/ Rådmann i Øygarden kommune
- To representantar for Bergen kommune, inkludert leiar i styringsgruppa
- Ein representant for KS – observatør
- Ein representant for Fylkesmannen i Vestland – observatør

Styringsgruppa fattar avgjerder av overordna karakter i saker som partane må avklare i fellesskap for å realisere formålet med samarbeidet.

Styringsgruppa behandlar mandat og budsjett for sekretariatet og enkeltprosjekt som blir tatt i vare gjennom samarbeidet. Styringsgruppa behandlar òg andre dokument som er styrande for prosjekt i samarbeidet, avgjer og prioriterer fellesprosjekt og finansiering av desse, og oppfølging av framdrift og leveransar.

Endringar i dokumenta som er nemnde over skal òg godkjennast av styringsgruppa.

Styringsgruppa møtest kvartalsvis og elles ved behov.

Styringsgruppa skal søke konsensus om avgjerder. Dersom konsensus ikkje blir nådd, avgjer leiar i styringsgruppa.

Kvar part med gjennomføringsansvar skal sørge for at avgjerder fatta i styringsgruppa blir gjennomførte.

Sekretariat

Bergen kommune utpeikar leiar for sekretariatet. Leiar for sekretariatet har ansvar for å realisere samarbeidet i medhald av samarbeidsavtalen, mandat og andre vedtak fatta i styringsgruppa.

Sekretariatet forvaltar den samla porteføljen av nasjonale og regionale tiltak og prosjekt på vegner av styringsgruppa. Sekretariatet skal ta i vare følgande funksjonar:

- Administrasjon (følge opp samarbeidsavtalen og koordinere underliggende tiltak og prosjekt)
- Budsjettering, budsjettoppfølging og tildeling av midlar innanfor vedtatte rammer
- Etablere interne rutinar og prosessar knytte til prosjektgjennomføring
- Koordinere ekstern kommunikasjon og samhandling
- Dokumenthandtering og arkivering
- Administrativ forvaltning av metodar, verktøy og felles spesifikasjonar

Ressursgruppe

Det blir etablert ei ressursgruppe som består av digitaliseringssjefar eller tilsvarande i sentrale deltakarkommunar og leiar for sekretariatet. Gruppa kan utvidast med sentrale ressursar innanfor sekretariatet sine ulike fag-/tenesteområde. Formålet med ressursgruppa er å sikre realisering av samarbeidsavtalen sitt formål, styrke samhandlinga på tvers av kommunane og understøtte integrerande prosessar og oppgåveløysing som bidrar til den felles gjennomføringa.

Sekretariatet kan foreslå etablering av faggrupper innanfor spesifikke område relatert til digitalisering, medrekna arkitektur, sikkerheit, teknologi mv. Etablering av slike grupper, med tilhøyrande mandat, blir avgjort av styringsgruppa.

Gjennomføringsprosjekt

Gjennomføringsprosjekta har ansvar for realisering av tiltak innanfor formål i samarbeidsavtalen. Porteføljen av prosjekt skal forankrast i styringsgruppa og leiast av enkeltkommunar. Styringsgruppa har rolla som porteføljestyre.

For kvart prosjekt skal det avtalast mandat og budsjett som er forankra blant dei deltakande partane og i styringsgruppa. Partane er forplikta til å delta aktivt inn i prosjekta og forhalde seg til rammer gitt gjennom samarbeidsavtalen.

Finansiering

Samordna regional digitalisering vil bli finansiert gjennom midlar tilordna frå dei deltakande kommunane, med tillegg av midlar stilt til rådvelde for sekretariatet frå andre aktørar. Ut over dette deltar kommunane med eigeninnsats og finansiering inn i samarbeidet for å gjennomføre enkeltprosjekt og tiltak.

I dei tilfella der sekretariatet leverer tenester og spesialistkompetanse på område som den enkelte kommune elles ville kjøpt i marknaden eller tilsett i eigen organisasjon, skal dette avtalast og finansierast særskilt.

Enkeltprosjekt og tiltak blir finansiert særskilt. Plan for finansiering av det enkelte prosjekt skal leggest fram for styringsgruppa for vedtak. Den enkelte kommune har eit sjølvstendig ansvar for interne kostnader knytte til mottak av prosjekt og å realisere gevinstar av arbeidet.

Varigheit

Avtalen gjeld frå underteikningstidspunktet og til 1. januar 2025.
Avtalen skal evaluerast 1. halvår 2023.

Endringar

Alle endringar til denne avtalen skal gjerast skriftleg, og krev semje mellom alle avtalepartane.

Stad, xx. månad 2020

For

.....
kommune

.....
kommune

